

15/10/2003

Bukan mustahil Malaysia jadi kuasa besar Islam

Dzulkarnain Taib

MALAYSIA sekali lagi menunjukkan kepemimpinan bertaraf dunia yang matang dan berwawasan apabila diberi penghormatan menjadi tuan rumah kepada Sidang Kemuncak Pertubuhan Persidangan Islam Ke-10 yang sedang berlangsung. Negara Islam menaruh harapan tinggi kepada kepemimpinan Perdana Menteri, Datuk Seri Dr Mahathir Mohamad, untuk menebus kembali maruah umat Islam dan tugas berat serta mulia ini bakal disambung oleh Datuk Seri Abdullah Ahmad Badawi.

Dalam keadaan geopolitik dunia masa kini, umat Islam bertali arus dirundung malang. Banyak negara Islam yang merdeka hanya pada nama, tetapi masih menurut kehendak kuasa besar. Malah, sebilangan besar penduduk negara Islam yang kaya dengan sumber alam masih hidup dalam keadaan daif dari segi ekonomi, pendidikan dan sosiobudaya.

Umat Islam seluruh dunia mengimpikan zaman kegemilangan seperti satu ketika dulu dan dahagakan satu kepemimpinan yang kuat, tegas, bervisi dan mempunyai kedudukan moral yang dihormati. Malaysia menepati ciri-ciri ini dan adalah tidak mustahil Malaysia juga akan muncul sebagai sebuah kuasa besar Islam yang dihormati dan digeruni suatu masa kelak.

Penumpuan Malaysia untuk membangunkan umat Islam dalam aspek penguasaan ilmu dan kemerdekaan ekonomi menunjukkan sikap Malaysia yang menolak sebarang bentuk keganasan dalam menangani isu yang berkaitan dengan kepentingan umat Islam.

Cadangan Malaysia dalam penggunaan dinar emas untuk perdagangan dua hala di antara negara Islam adalah satu tindakan yang berani dan inovatif dalam persekitaran ekonomi global yang dicengkam sistem kapitalis.

Penegasan Malaysia dalam mengatasi masalah keganasan antarabangsa melalui penyelesaian akar umbi fenomena ini juga diakui kebenarannya, terutama negara Barat.

Dalam aspek perpaduan umat, Malaysia muncul sebagai model kejayaan yang mendapat sanjungan tinggi di mata dunia. Malaysia berjaya menyatukan pelbagai bangsa yang hidup di bumi bertuah ini melalui perkongsian kuasa dan pengagihan kekayaan yang adil.

Kini tibalah masanya Malaysia menterjemahkan konsep ini untuk meliputi 1.3 billion umat Islam di seluruh dunia. Dunia Islam ternanti-nanti untuk bersama-sama mengecap kebahagiaan dan kenikmatan perpaduan yang wujud di negara ini.

DZULKARNAIN TAIB,
Presiden Kelab Wartawan Muda Malaysia.